



Uunga siunnersuut: Kommunini suliassaqarfiit aaqqissuuteqqinneqarnerata allannngortinneqarneranik Inatsisartut inatsisaat nr. xx, xx,xxx 2016-imeersoq.
(Naalakkersuisut Siulittaasuut)

(Siullermeernera)

Matumani siunnersuut Naalakkersuisuneersoq oqaluuseraarput, Qaasuitsup kommuniata marlunngorlugu avinneqarnissaa pillugu. Ilisimatitsissutigineqarpoq kommunalbestyrelsip tamarmiusup Naalakkersuisunut inassutigisimagaa, maannakkut kommuniusoq marlunngorlugu avinneqassasoq.

Kisianni Qaasuitsup kommuniani kommunalbestyrelsi tusaqqaakkatsitut immaqaa isumaqatigiitsiginngilaq? Assersuutigalugu kommunalbestyrelsimi ilaasortaq Siumumeersoq tusagassiutinut nalunaaruteqarluni allappoq kommuni pingasunngorlugu avinneqassasoq.

Paarlattuanilli paasinarpoq innuttaasut annertuumik kissaatigigaat kommunip avinneqarnissaa. Innuttaasut 81 procentii 2014-mi marsip qaammataani taasipput kommuni avinneqassasoq - tamannali paasissutissiinertaqarpiannngitsumik pivoq, ilaatigut kommunit avinneqarpata aningaasatigut kingunerusussat iluamik ilisimaneqarsimanngimmata.

Demokraatini kommunini innuttaasut qanimut oqartussaaqataanissaat qularnaarusupparput. Taamaattumik tapersorsorparput Qaasuitsup kommuniata avinneqarnissaanut kissaatigarneq politikerit innuttaasullu oqaatigisaat. Uangutsinnulli pingaaruteqarpoq oqaatigissallugu, nassaarineqartariaqarmat piffissaq ungasinnerusoq isigalugu aaqqiissutissaq atasinnaasoq, siunissami ukiorpassuarni atasinnaasoq. Aamma pinngitsoorusunngilagut oqaatigissallugu Qaasuitsup kommuniani najugaqartut kissaatigisaat Namminersorlutik Oqartussanut kommuninulluunniit allanut aningaasartuuteqarnerunermik kinguneqassanngimmat. Taamaattumik Kommunip avinneqarneranut aningaasartuutit aamma kommunit nutaat siunissami ingerlannerannut immikkut aningaasartuutaajumaartussat maannakkut Qaasuitsup Kommunianut atugassiissutigineqartut missingersuutit iluaniittariaqassapput. Aamma assiganik kommunit iluini naligiissaarutit pillugit isumaqatigiissutigineqarumaartussani qularnaarneqassaaq ullumimut naleqqiullugu kommunit allat naligiissaarinermut akiliinerusannginissaat.

Isumaqarpugut tamanna naapertuuttuliornerinnaassasoq. Nunap sinnerata najukkami kommunip avinneqarnissaanut kissaat akilissanngilaa. Tamanna tunngavigalugu nuannaarutigaarput



Qaasuitup kommuniani kommunemut inuillu tamat oqartussaaqataanerat pillugu ataatsimiititaliap siulittaasua KNR-mut ima oqarmat:

"10 milliunimininnguit suunngillat, imatorsuunngillat. Akilerumaarpagut. Sapinngilagut. Aamma artornavianngilagut aningaasarpassuunngimmata."

Siulittaasup oqaasii tunngavigalugit Demokraatini imatut paasivarput, ajornartorsiutaanavianngitsoq isumaqatigiissutigissallugu Qaasuitsup Kommuniata kommunip avinneranut siunissamilu ingerlatsinermut aningaasartuutissat akilissagai.

Demokraatini suliap nangeqqinneranut atatillugu kaammattuutigissavarput Inatsisunik atortitsinermut ataatsimiititaliap Qaasuitsup Kommuniani aalajangiisartut qanimut oqaloqatigilissagaat najukkami kissaatigisat pisariaqartitallu paasilluarumallugit. Oqaloqatigiinnerli pissaaq Qaasuitup kommuniani kommunemut inuillu tamat oqartussaaqataanerat pillugu ataatsimiititaliap siulittaasuata kommunip avinneqarneranut atatillugu kommunip aningaasartuutit nammineq akilersinnaagai pillugu oqaasii ataqqillugit.

Tamanna tunngavigalugu Demokraatini siunnersuutip Inatsisunik atortitsinermut ataatsimiititaliamit suliareqqinneqarnissaa innersuupparput.